

長治縣志卷之七

傳五

循政傳

軍州
州縣

道

軍州

辛彥之隴西狄道人九歲而孤不交非類博涉經史仕周至少宗伯高祖受禪拜禮部尙書與祕書監牛宏撰新禮後拜隨州刺史遷潞州前後俱有惠政信佛於城內立浮圖二所並十五層開皇十一年州人張元暴死數日乃蘇云遊天上見新構一堂制極崇麗元問其故云潞州辛彥之有功德造此堂以待之彥之聞而不悅

其年卒於官諡曰宣所撰墳典六官祝文禮要新禮五

經異義並行於世

隋書儒林傳

右隋刺史一人案隋書潞州刺史有惠政者尙有柳
昂府志人名宦據寰宇記潞州於開皇十年自襄垣
移於今治昂在州表請勸學行禮事在開皇三年而
彥之於十一年卒官則昂未嘗歷此地非縣志例所
當載縣自開皇至今千有餘年嘗爲府州軍治不改
子城尙傳爲隋時所築彥之締造之功實不可沒而
唐人佞佛史家又好記異聞但稱其立浮圖而已

案彥

之所建二寺梵境寺在城東北久廢寶雨寺在城西南塔基猶存

王行敏并州樂平人隋末爲盜長高祖興來降拜潞州
刺史遷屯衛將軍劉武周入并州寇上黨取長子壺關
或言刺史郭子武懦不支且失潞帝遣行敏馳往旣至
與子武不叶賊圍急儲待空乏衆恟懼行敏患之會有
告子武謀反遂斬之州民陳正謙者以信義稱鄉里出
粟千石濟軍由是人自奮賊乃去行敏又敗竇建德兵
於武陟武德四年督兵循燕趙與劉黑闥戰厯亭破之
旣而釋甲不設備爲黑闥所掩縛致麾下終不屈賊遂
斬之且死西向跪曰臣之志惟陛下知之帝聞而悼惜

唐書忠

義傳

程千里京兆萬年人長七尺魁岸有力應募積西累官
安西副都護天寶末兼北廷都護安西北廷節度使右
金吾衛大將軍留宿衛安祿山反詔募兵河東卽拜節
度副使雲中太守遷上黨長史賊來攻麀馘多累加開
府儀同三司禮部尙書至德二載賊將蔡希德圍上黨
輕騎挑戰千里恃勇開縣門率百騎欲直禽希德幾得
而救至乃退會橋壞馬顛爲賊執仰首敕諸騎使還曰
爲我報諸將可失帥不可失城軍中皆爲泣下增備固
守賊不能下乃還囚千里至東都安慶緒僞署特進囚
客省慶緒敗爲嚴莊所害後赦令數下追褒死難者惟

千里生見執不及云

唐書忠義傳

李抱真字太元河西人抱玉從父弟也沈慮而斷抱玉屬以軍事授汾州別駕僕固懷恩反陷焉挺身歸京師代宗以懷恩倚回紇所將朔方兵精憂之召抱真問狀答曰郭子儀嘗領朔方軍人多德之懷恩欺其下曰子儀爲魚朝恩所殺今起而用之是伐其謀兵可不戰解也旣而懷恩敗如抱真策遷殿中少監陳鄭澤潞節度留後旣謝因言百姓勞逸在牧守願得一州以自試更授澤州刺史兼澤潞節度副使徙懷州仍爲懷澤潞觀察留後凡八年抱真策山東有變澤潞兵所走集乘戰

伐後賦重人困軍伍彫剝乃籍戶三丁擇一蠲其徭租
給弓矢令閑月得曹偶習射歲終大校親按籍第能否
賞責比三年皆爲精兵舉所部得成卒二萬既不稟於
官而府庫實乃曰兵可用矣繕甲淬兵遂雄山東天下
稱昭義步兵爲諸軍冠久之爲澤潞節度行軍司馬會
昭義節度李承昭病詔抱真權磁邢兵馬留後德宗嗣
位檢校工部尙書領昭義節度使建中中田悅反圍邢
洛詔抱真與河東馬燧合神策兵救之以功進檢校尙
書右僕射會朱滔王武俊反救悅抱真退保魏帝狩奉
天聞問諸將皆哭各引麾下還屯於時李希烈陷汴李

納反鄆李懷光反河中抱真獨以數州截然橫絕潰叛
中離沮其姦爲羣盜所憚興元初檢校左僕射同中書
門下平章事由倪國公進義陽郡王以大義說王武俊
合從擊朱滔大破潛經城進檢校司空貞元初朝京詔
還所鎮抱真喜士聞世賢者必欲與之游雖小善皆卑
禮厚幣邀致之會天下稍無事乃飾臺沼以自娛卒子
緘以印鑰上監軍發喪赴東都詔贈抱真太保

唐書
本傳

王虔休字君佐汝州梁人少涉學有材武以信義爲鄉
黨畏慕澤潞李抱真聞其名厚幣招授兵馬使抱真討
河北戰雙岡臨洛虔休以功擢步軍都虞侯封同昌郡

王

府志云郡王疑誤

實封五十戶抱真卒元仲經等謀樹其子

緘一軍思亂虔休正色語衆曰軍王軍州王土也帥亾

當稟天子何云云有妄謀衆服其言得不亂德宗嘉之

以邕王爲昭義節度大使擢虔休潞州左司馬領留後

本名延貴至是賜名號令撫循軍中大治治潞二歲遷

昭義節度使檢校工部尙書始屬城州縣守宰多署他

職不親政故治苟簡虔休悉增俸稟遣就部人以安安

卒贈尙書左僕射諡曰敬虔休性格敏節用度旣沒帑

廩皆可支數歲常得太常樂家劉玠撰繼天誕聖樂因

帝誕日以獻後中和樂本於此

唐書本傳

郗士美字和夫兗州金鄉人年十二通五經史記漢書
皆能成誦未冠爲陽翟丞佐李抱真潞州幕府以才歷
王虔休李元皆留不徙久乃進房州刺史由河南尹檢
校工部尙書充昭義軍節度使昭義自抱真以來皆武
臣私厨月費米六千石羊千首酒數十斛潞人困甚士
美悉去之出廩錢市物自給又慮從史時日具三百人
膳以餉牙兵士美曰卒衛於牙固職也安得廣費爲私
恩亦罷之討王承宗也遣大將王獻督萬人爲前鋒獻
恣橫逗撓士美卽斬以徇下令曰敢後者斬親鼓之大
破賊下三營最先有功憲宗喜曰固知士美能辦吾事

承宗大震懼會詔班師然威震兩河以疾召拜工部尙

書爲忠武節度使卒贈左僕射諡曰景

唐書本傳

辛祕係出隴西貞元中擢明經第其學於禮家尤洽憲
宗初拜潞州刺史會河東范希朝出討王承宗召祕爲
希朝司馬主留務累遷汝州刺史河南尹進拜昭義軍
節度使是時承討王恒趙之後潞州彫耗祕至則約出
入嗇用度比四年儲錢十七萬緡糧七十萬斛器械堅
良隱然復爲完鎮召還道病卒贈尚書左僕射諡曰肅
後更諡懿祕爲大官居不易第服不改初其俸祿悉與
裏表親屬病自銘其墓作書一通緘之卒後發視則送

終制也儉而不違於禮云

唐書本傳

沈詢吳人第進士咸通中檢校戶部尚書潞州長史昭義節度使治尚簡易人皆便安奴結牙將夜攻詢滅其家贈兵部尚書左散騎常侍劉潼代爲節度馳至剗奴

祭詢

唐書列傳

李殷銳中和中潞州刺史李克用寇潞州殷銳死之

本紀

孫揆字聖圭潞州涉縣人刑部侍郎逖五世孫也第進

士辟戶部巡官歷中書舍人刑部侍郎京兆尹昭宗討

李克用以揆爲兵馬招討制置宣慰副使旣而更授昭

義軍節度使以本道兵會戰克用伏兵刀黃嶺執揆厚

禮而將用之曰公當從容廟堂何爲自履行陣也揆大罵不屈克用怒使以鋸解之鋸齒不行揆謂曰死狗奴解人當束以板汝輩安知行刑者如其所言詈聲不輟至死昭宗憐之贈左僕射

唐書忠義傳

李克修字崇遠國昌子從討龐勛以功拜朔州刺史兄克用鎮雁門爲奉誠軍使後表昭義節度使數出山東擊孟方立又與李罕之攻懷孟克用自將擊方立還軍過潞供饋甚薄克用怒詬而笞之克修慙憤發疾卒克修爲人簡儉潞人素安其政其卒也人皆哀之

五代史唐家人

傳

右唐節度刺史十人府志名宦後附政績所列張仵
孔戡烏重允溫造賈直言唐漢賓李佐之並名宦李
襲譽韓王元嘉鄭王元懿李嗣真李濬王思禮陸長
源李抱玉魏琚盧瑱薛茂卿李丕李師誨盧鈞裴休
唐持劉潼丁會王中立並政績案李襲譽張仵李嗣
真王思禮李抱玉魏琚盧瑱事蹟並不在潞李濬盧
鈞裴休唐持劉潼丁會王中立本傳在潞亦無實政
韓王元嘉鄭王元懿孔戡溫造賈直言及劉稹之變
諸人並詳別傳

牛存節字贊正青州博昌人爲人木強忠謹事梁太祖

拜臺宿二州刺史遷潞州都指揮使太祖攻鳳翔使召存節存節爲將法令嚴整而善得士心潞人送者皆號泣

五代史本傳

右梁都指揮使一人

李嗣昭太谷縣人爲人短小而膽勇過人初嗜酒太祖嘗微戒之遂終身不飲太祖愛其謹厚嘗從用兵力戰之功爲多天祐三年與周德威攻梁潞州降丁會以嗣昭爲昭義軍節度使梁遣李思安將兵十萬攻潞築夾城以圍之梁太祖遣人招降嗣昭斬其使者閉城距守踰年莊宗始破夾城嗣昭完緝兵民撫養甚有恩義

五代

史本傳

任圜京兆三原人爲人明敏善談辯見者愛其容止及聞其議論縱橫益皆悚動李嗣昭節度昭義辟圜觀察支使梁兵築夾城圍潞州踰年而晉王薨晉兵救潞者皆解去嗣昭危甚問圜去就之計圜勸嗣昭堅守以待不可有二心已而莊宗破梁夾城聞圜爲嗣昭畫守計甚嘉之由是益知名後嗣昭與莊宗有隙圜數奉使往來辯釋讒構嗣昭卒免於禍圜之力也明宗立拜圜同中書門下平章事致仕居磁州安重誨矯制殺之愍帝

卽位贈太傅

五代史本傳

右後唐節度觀察二人府志政績有石君立裴約張
居翰李承約盧文進諸人案其事實皆不在潞盧文
進傳言文進居數鎮頗有善政亦不專言潞

李筠并州太原人善騎射從周祖起兵入汴拜彰德軍
節度使及召潞州常思入朝以筠爲昭義軍節度使恭
帝卽位加檢校太尉宋建隆初遣使諭以受周禪加兼
中書令筠卽欲拒命左右切諫及延使者升階置酒張
樂遽索周祖畫像懸壁涕泣不已賓佐惶駭告使臣令
公被酒失其常性勿以爲訝北漢主聞之以蠟書約筠
共舉兵太祖手詔慰撫之且官其子守節筠謀愈甚遂

起兵北漢主親將來援筠自言受周祖大恩不敢愛死周漢仇也以故漢主不悅留監軍而返筠以其子守節守上黨引衆南向據澤州太祖親督戰破之筠赴火死進伐上黨守節以城降

宋史周三臣傳

右後周節度一人

柴禹錫字元圭太宗以藩府舊僚多諮訪外事擢樞密副使出知潞州州民乞留三載詔獎之後復知樞密院事卒贈太尉

宋史本傳

韓國華字元弼相州安陽人魏國公琦父也太平興國二年進士至道中知潞州轉運使言其善綏輯供億幹